

Ku dhaqan Xafiis D.

FAAFINTA

الرسمية

OFFICIAL



RASMIGA AH

الجريدة

BULLETIN

EE JAMHUURIYADDA SOOMAALIYA

Sanadka 13aad

Muqdisho, 01 August 2026

Lr.3

Waaxda Maamulka Faafinta Rasmiga ah
Ee Xafiiska Garyaqaanka Guud ee Dawladda

FAAFIN BIL SOO BAXA

Qiimaha waa \$XXX Dollar, lambar waliba – **RUKUNKA:** Sanaddii waa \$XXX Dollar, Soomaaliya gudaheeda – Dibaddeedana waa \$XXX Dollar. Rukunka la weydiisto waqtiga loo gooyay wuxuu ka bilaabmaa 1 Janaayo. Qiimaha Qoritaanku F.R halkii sadar iyo wixii ka yar waa \$XXX Dollar – Rukunka iyo Qoritaanku waxaa la weydiistaa Laanta Maamulka Faafinta Rasmiga ah – Lacagta waxaa lagu bixiniyaa Xafiiska Canshuuraha ee Wasaaradda Maaliyadda.

KOBNIIN

BOGGA KOOWAAD

SHARCI

W.M

BOGGA LABAAD

XEER

BOGGA SEDDEXAAD

TALOOYIN, ISGAARSIIN, OGAYSIIS, IWM

BILAHA

March-July

2026



Xeer Ra'iisul Wasaare Lr.201

Taariikh:09/05/2026

XEERKA: XEER-NIDAAMIYAHA CAFISKA GUUD



Ra'iisul Wasaaraha Xukuumadda JFS;

Markuu arkay: Dastuurka Jamhuuriyadda Federaalka Soomaaliya;

Markuu arkay: Qodobka 30^{aad} Ee Xeerka La dagaalanka Argagixisada & Qodobka 144^{aad} Ee Xeerka Cigaabta Soomaaliyeed (Sharci Lr. 5/1963).

Markuu arkay: Warqadda summaddeedu tahay WCAD/XW/2822/01/26 ee ku taariikheysan 12/01/2026 ee Wasaaradda Caddaaladda & Arrimaha Dastuurka kuna saabsan codsiga soojeedinta Xeer-nidaamiyaha Cafiska Guud;

Markuu arkay: Go'aanka Shirka Golaha Wasiirrada ee summaddiisu tahay SHGW.10.150.4.26 ee 15/04/2026, kuna saabsan Ansixinta "Xeer-nidaamiyaha Cafiska Guud" oo uu Goluhu cod buuxa ku ansixiyay;

Markuu tixgeliyay: Muhiimadda Xeer-nidaamiyahan u leeyahay kor uqaadidda nabadda iyo xasiloonida dalka.

Wuxuu Meelmariyay

Qodobka 1^{aad}

Go'aan Gole

Go'aanka Shirka Golaha Wasiirrada ee summaddiisu tahay SHGW.10.150.4.26 ee 15/04/2026, kuna saabsan ansixinta Xeer-nidaamiyaha Cafiska Guud oo uu Goluhu cod buuxa ku ansixiyay.

Qodobka 2^{aad}

Hirgalin

Waxaa Wasaaradda Caddaaladda & Arrimaha Dastuurka loo igmaday in ay hirgaliso meelmarisana Xeer-nidaamiyahan.

Qodobka 3^{aad}

Dhaqangal

Xeer-nidaamiyahan waxaa uu dhaqangalayaa marka uu saxiixo Ra'iisul Wasaaraha Xukuumadda Jamhuuriyadda Federaalka Soomaaliya, waxaana lagu soo saarayaa faafinta Rasmiga ah ee Dowladda.



Mudane, Hamza Cabdi Barre
Ra'iisul Wasaaraha Xukuumadda JFS.





THE FEDERAL REPUBLIC OF SOMALIA
OFFICE OF THE STATE ATTORNEY GENERAL

Summad: XGG/441/2025

20/10/2025

Ku: Agaasinka Golaha Wasiirrada

Muqdisho

Ku: Wasaaradda Cadaaladda & Arrimaha Dastuurka

Muqdisho

Og: Xafiiska Ra'iisul-wasaaraha Xukuumadda JFS

Muqdisho

Ujeeddo: Talo Sharci

Xafiiska Garyaqaanka Guud ee Dawladda oo tiixraacaya warqadda Summaddeedu tahay: **WCAD/XAWSH&H/2674/2025** ee ku taarikheysan **29/11/2025** kana soo baxday Wasaaradda Cadaaladda iyo Arrimaha Dastuurka, ujeedadeeduna ahayd: **Soo gudbin "XEER-NIDAAMIYAHA CAFISKA GUUD"**

Xafiiska Garyaqaanka Guud ee Dawladda, asaga oo gudanaya waajibaadkiisa shaqo si Waafaqsan **Sharci Lr. 18 ee 29 Jannaayo 1976**, ayaa waxa uu halkaan idin kugu soo gudbinayaa Xeer-nidaamiyaha sare ku xusan oo ay Wasaaradda Caddaaladda iyo Arrimaha Dastuurka horay ugu soo gudbisay Xafiiska, si uu uga guto waajibaadkiisa shaqo, ugana bixiyo Talo Sharci.

Haddaba, Xafiiska Garyaqaanka Guud ee Dawladda kadib markii uu darsay Nuqulka Xeer-nidaamiyahani, islamarkaana waafijayay Shuruucda Dalka, ayaa waxa uu Xafiisku ku talinayaa in Xeer-nidaamiyahan, loo gudbiyo Golaha Wasiirada, maadaama uusan kahor-imaaneyn Dastuurka iyo Shuruucda Dalka.

Ugu dambeyn, Xafiiska Garyaqaanka Guud waxa uu ku wargelinayaa Agaasimaha Golaha Wasiirrada in nuqulka ku lifaaqan warqaddan uu yahay nuqulka asalka ah ee loo gudbinaayo Golaha Wasiirrada sii ay u meel-mariyaan si waafaqsan **Xeer Ra'iisul-wasaare Lr. 125 ee 06 April 2023**

FG: Waxa halkan ku lifaaqan Xeer-nidaamiyaha Sare ku xusan.

Dr. Cabdiraxmaan Maxamuud Xirsi

Ku-Xigeenka Garyaqaanka Guud ee Dawladda





Federal Republic of Somalia
Ministry of Justice and Constitutional Affairs
Office of Director Legislations and Agreements Department

SUMMAD: WCAD/XAWSHH/2674/2025

Tr. 29/11/2025

Mudane Garyaqaan,

UJEEDDO: SOO-GUDBIN “XEER-NIDAAMIYAHA CAFISKA GUUD”

Wasaaradda Caddaaladda iyo Arrimaha Dastuurka, waxa ay halkan ku soo gudbinaysaa “Xeer-nidaamiyaha Cafiska Guud” oo abuuraya hannaan sharci iyo mid maamul oo lagu nidaaminayo cafiska guud.

Xeer-nidaamiyaha waxa uu qeyb ka yahay qorshaha Wasaaradda Caddaaladda iyo Arrimaha Dastuurka ee 2025 iyo sidoo kale hawlaha hortabinta u leh Xukuumadda Danqaran ee Jamhuuriyadda Federaalka Soomaaliya.

Haddaba, waxaan Xafiiska Garyaqaanka Guud ee Dawladda ka codsanaynaa in uu ka guto waajibkiisa sharci ee ku aaddan xeer-nidaamiyeyasha si habraaca ansixintu u dhammeystirno.

Wada-shaqeyn wacan.



Mudane Xasan Ahmed Cali
Agaasimaha Waaxda Sharciyada iyo Heshiisyada,
Wasaaradda Caddaaladda iyo Arrimaha Dastuurka


Garyaqaanka Guud ee Dawladda
Og: Agaasimaha Guud ee Wasaaradda Caddaaladda iyo Arr. Dastuurka
Og: Xoghayaha Joogtada ah ee Wasaaradda Caddaaladda iyo Arr. Dastuurka
Og: Wasiir Ku-xigeenka Wasaaradda Caddaaladda iyo Arr. Dastuurka
Og: Wasiiru-dawlaha Wasaaradda Caddaaladda iyo Arr. Dastuurka
Og: Wasiirka Wasaaradda Caddaaladda iyo Arr. Dastuurka

=Muqdisho=
=Muqdisho=
=Muqdisho=
=Muqdisho=
=Muqdisho=
=Muqdisho=

Address: Martine Hospital Road, Mogadishu – Somalia.
Email: legislative@moj.gov.so

Tell: 0615847146

Dr. ~~Abdullahi~~ Cabdullahi
06/12/2025





**JAMHUURIYADDA FEDERAALKA SOOMAALIYA
WASAARADDA CADDAAALADDA IYO ARRIMAHA DASTUURKA**

XEER-NIDAAMIYAHA CAFISKA GUUD

Waxaa diyaariyay: Wasaaradda Caddaaladda iyo Arrimaha Dastuurka, 2025

ARAAR

Qaranka Soomaaliyeed waxaa uu dembiyada iyo ciqaabahooda ku maareeyaa Xeerka Ciqaabta Soomaaliyeed (X.C.S.), Xeerka Habka Ciqaabta Soomaaliyeed (XHC), iyo xeerarka gaarka ah sida Xeerka La-dagaallanka Argagixisada. Sida caadiga ah, xeerarku waxa ay aqoonsan yihiin Cafis Guud (Amnesty), Siidayn Guud (Indult) iyo Cafis Gaar ah (Pardon).

Cafiska Guud (Qod. 144 X.C.S.) waa marka dad aan la cayimin la siiyo cafis waxa uuna **baabi'inayaa dembiga/dembiyada**, halka Siideynta Guud iyo Cafiska Gaarka ah (Indult iyo Pardon, Qod.149 X.C.) loo sameeyo dad la tilmaamay dembiyada ay galeen ama qof ahaantooda loo sheegay waxa ayna **baabi'inayaan ciqaabta** ku dhacday dambiilaha. Halka **cafiska guud** uu saamaynayo raad kasta oo ciqaabeed oo heer ahaan gaareysa haddii ay socoto dacwad ciqaabeed in si degdeg ah loo gabagabeeyo “islamarkaana lagu dhawaaqo in aan dacwadaas la socodsiin karin” (Qod. 77 X.H.C.), **siideynta guud** waxa ay baabi'inaysaa oo keliya ciqaabta la riday, haseyeeshee ay dacwaddu sii soconeyso, ayna suurtagal tahay in xukun kale lagu rido, garsooraha wuxuu amrayaa dhaqangelinta siideynta guud oo natijada ka dambeysa ay tahay in aan la fulin ciqaabta ama fulinta ciqaabta hartay. **Cafiska gaarka ah (pardon)** waa uu ka duwan yahay siideynta guud (indult) maadaama uu yahay go'aan uu ka soo saaro Madaxweynaha Jamhuuriyadda qof gaar ah, sidaas darteed xiriir lama laha dad badan, waxa uuna baabi'inayaa oo keliya ciqaabta aasaasiga ah (principal penalty) sida xarigga, ee ma baabi'inayo ciqaabaha dulsarka ah (ciqaabaha raaca kuwa asalka ah), haddii dekeretadu aysan si ka duwan sidaasi u sheegin.

In kasta oo uu uusan Dastuurka KMG ah ka hadleyn cafis guud iyo siideyn guud, ee uu ka hadlayo oo keliya cafiska gaarka ah kaas oo ku xiran in uu qof soo weyddiisto uuna soo jeediyo Golaha Adegga Garsoorka, haddana Dastuurkii 1960-kii ayaa si cad uga hadlayay cafiska guud iyo siidaynta guud Qodobkiisa 64^{aad}, halka uu cafiska gaarka ah uga hadlayo Qodobkiisa 75^{aad} ee awoodaha iyo xilalka Madaxweynaha, iyada oo uusan ku xiraynin soo jeedin gole kale oo toos loo weyddiisan karo, xeerarka ciqaabta iyo habka ciqaabta oo ka soo farcamay dastuurkaasna sidaas ayay uga hadlayaan. Sidaas daraadeed, cafiska guud iyo siidaynta guud waxa ay u baahan yihiin xeer sidaasi oggolaanaya ama faahfaahinaya.

Sida oo kale, waxaa cafiska la xiriira ururrada argagixisada ka hadlay Sharciga La-dagaallanka Argagixisada, Qodobkiisa 30aad, oo sheegay in dembiyada argagixisada ee ku xusan sharciga La-dagaallanka argagixisada laga cafin karo xubnaha ka tirsan ururrada argagixisada markii laga helo shuruudo cayiman.

Sidaas daraadeed, waxaa lagama maarmaan ah in la helo xeer-nidaamiye lagu dhaqangelinayo Qodobka 30^{aad} ee Xeerka La-dagaallanka Argagixisada iyo Qodobka 144^{aad} ee Xeerka Ciqaabta Soomaaliyeed laguna maareeyo xaaladaha xubnaha ka soo goosanaya ururrada argagixisada ah.

Qodobka 1^{aad}

Magaca Xeer-nidaamiyaha

Xeer-nidaamiyahan waxaa loogu yeerayaa loona xiganayaa “Xeer-nidaamiyaha Cafiska Guud”.

Qodobka 2^{aad}

Eraybixin

Ereyada soo socda waxa uu mid kasta leeyahay micnaha ku hor qoran:

1. **Cafis Guud:** Cafiska lagu sheegay Qodobka 30^{aad} ee Xeerka La-dagaallanka Argagixisada iyo Qod. 144 ee Xeerka Ciqaabta Soomaaliyeed kaas oo baabi’inayaa dembiga/dembiyada la cafiyay.
2. **Ururrada Argagixisada ah:** Ururrada uu Xeerka La-dagaallanka Argagixisadu u aqoonsan yahay in ay yihiin argagixiso sida Al-shabaab iyo Daacish.
3. **Muwaadin:** Qofka ay xeerarka Jamhuuriyadda Federaalka Soomaaliya u aqoonsan yihiin in uu yahay muwaadin xaqna u leh in uu qaato kaarka aqoonsiga ee Qaranka.

Qodobka 3^{aad}

Ujeeddooyinka Xeer-nidaamiyaha

Xeer-nidaamiyahan waxa uu xaqiijinayaa ujeeddooyinka soo socda:

1. In la soo saaro xeer-nidaamiye lagu dhaqangelinayo Qodobka 30^{aad} ee Xeerka La-dagaallanka Argagixisada iyo Qodobka 144^{aad} ee Xeerka Ciqaabta Soomaaliyeed laguna caddaynayo in Madaxweynaha Jamhuuriyadda Federaalka Soomaaliya uu cafis guud u fidin karo xubnaha ururrada argagixisada ee buuxiyay shuruudaha cafiska guud si waafaqsan dhaqanka dastuuriga ah ee taabbagalay.
2. In la abuuro hannaan sharci ah oo lagu bixin karo laguna maarayn karo cafiska guud ee loo fidinayo xubnaha ururrada argagixisada ah si waafaqsan Dastuurka Qaranka iyo xeerarka kale ee dalka.
3. In la ilaaliyo xuquuqda dhibbaneyaasha iyada oo la sheegayo hannaanka lagu xallinayo tabashooyinka iyo xadgudubyada madaniga ah.

Qodobka 4^{aad}

Bixinta Cafiska Guud

1. Madaxweynaha Jamhuuriyadda Federaalka Soomaaliya waxa uu bixin karaa cafis guud isaga oo xeerinaya duruufaha ku xeeran dagaalka ka dhanka ah ururrada argagixisada, si waafaqsan qodobbada xeer-nidaamiyahan.
2. Cafiska guud ee loo fidiyo xubnaha ururrada argagixisada, waxaa uu baabi'inayaa dhammaan dembiyada ay xubnahaasi galeen ee laga cafiyay, marka laga reebo:
 - a) Dembiyada caadiga ah ee aan lahayn dabeecad siyaasadeed ama fikradeed isla markaana aan lagu galin xayndaabka iyo amarka ururrada argagixisada, oo ay ka mid yihiin dembiyada sida shakhsiga ah ay xubnuhu u galeen iyaga oo ka duulaya dano shakhsi ah; iyo
 - b) Dembiyada ku qeexan Shareecada Islaamka iyo dembiyada uu Madaxweynuhu ka reebo ama ku xiro shuruudo gaar ah isaga oo ka duulaya danta guud ee Qaranka.

Qodobka 5^{aad}

Shuruudaha Cafiska Guud

1. Qofka muwaadinka ah ee ka tirsan ururrada argagixisada, waxa uu ka faa'iidayaan karaa cafiska guud ee Madaxweynuhu uu fidiyo, haddii uu qaado dhammaan tallaabooyinka soo socda:
 - a) In uu ku soo wargeliyo hay'adaha amniga ee ku shaqada leh isaga oo si iskiis ah isugu soo dhiibaya hay'adahaasi, warbixin dhammaystiranna ka bixinaya dhammaan arrimaha iyo hawlaha uu xog-ogaalka u yahay;
 - b) In uu aqoonsado/aqbalo xuduudaha, xeerarka, gobonnimada qarameed, iyo dowladnimada Jamhuuriyadda Federaalka Soomaaliya isaga oo caddaynaya in uu ka tanaasulay in uu gacan-ka-hadal (violence) ku raadiyo talada dalka ama ujeeddooyin kale oo siyaasadeed;
 - c) In uu joojiyo wax kasta oo fal-dembiyeed ah isaga oo caddayn sugan ku sheegaya in uu ka baxay kooxda ama ururka uu ka tirsanaa kuna shaqayn doonin fikirkooda mar dambe; iyo
 - d) In uu buuxiyo wixii shuruudo kale ah ee uu ku xiro Madaxweynaha.
2. Xubnaha shisheeye ee ku jira ururrada argagixisada, waxaa lagu maareynayaa siyaasad gaar ah oo ay Golaha Wasiiradu ansixiyaan.

Qodobka 6^{aad}

Raadadka Qaanuun ee Cafiska Guud

1. Xubinta ka faa'iidaystay Cafiska Guud laguma soo oogi karo dembiyada ku jira cafiska guud ee Madaxweynuhu u fidiyay mana la saari karo ciqaabtooda inta ay nooshahay.
2. Haddii xubinta ka faa'iidaystay Cafiska Guud ay jebiso shuruudaha ay ku mutaysatay cafiska, waxaa lagala laabanayaa cafiskii ay ka faa'iidaystay iyada oo xubinta ay khusayso laga soo qaadayo in aan hore loo cafin.
3. Cafiska guud ma baabi'in karo xuquuqda iyo xadgudubyada gaarka ah ee si shakhsi ah looga galay qof ama dad gaar ah waxaana lagu maaraynayaa nidaamka caddaaladeed ee dalka si waafaqsan Shareecada Islaamka iyo xeerarka dhaqangalka ah.

Qodobka 7^{aad}

Dhaqangelinta Cafiska Guud

1. Hay'adda Sirdoonka iyo Nabadsugidda Qaranka ayaa u xilsaaran qiimaynta, hubinta, iyo maaraynta arrimaha xubnaha ka faa'idaysanaya cafiska guud, iyada oo Agaasimaha/Taliyaha Hay'adda uu warqad rasmi ah ku caddaynayo xubnaha buuxiyay shuruudaha Cafiska Guud kana faa'iidaystay si waafaqsan xeer-nidaamiyahan iyo shuruudaha uu Madaxweynuhu ku xiro.
2. Hay'addu waxa ay warbixin lix biloodle ah siinaysaa Madaxweynaha, Ra'iisulwasaaraha, Golaha Wasiirrada, iyo Golaha Amniga Qaranka.
3. Liiska magacyada xubnaha cafiska guud ka faa'iideeyey waxaa la gaarsiinayaa Hoggaanka Baarista Dembiyada ee Boliiska Soomaaliyeed iyo Xafiiska Xeer-ilaaliyaha Guud ee Qaranka

Qodobka 8^{aad}

Taageerada iyo Dib Ugu Celinta Bulshada

1. Xukuumadda Xukuumadda Federaalka Soomaaliya waxa ay taabbagelinaysaa barnaamijyo lagu fududaynayo dib ugu celinta bulshada ee xubnaha ka faa'iidaystay Cafiska Guud, gaar ahaan arrimaha waxbarashada iyo shaqooyinka ay qabankaraan.
2. Xarunta Qaran ee La dagaallanka Argagixisada iyo Ka hortagga Fikirka Xagjirka ah ee Tubsan oo hoostagta Xafiiska Ra'iisul Wasaaraha oo kaashaneysa Wasaaradaha ku shaqada leh, ayaa u xilsaaran hirgelinta barnaamijyadaasi iyada oo si toos ah ula shaqaynaysa hay'adaha labada heer ee dowladda iyo cid kasta oo danaynaysa arrimaha xubnaha ka faa'iidaystay cafiska guud

Qodobka 9^{aad}
Xaaladda Kalaguurka

1. Cafiska Guud ee Madaxweynuhu fidiyay ka hor inta aan la soo saarin Xeer-nidaamiyahan, waxaa laga soo qaadayaa in loo fuliyay si waafaqsan Xeer-nidaamiyahan.
2. Xubnihii hore ee ka faa'iidaystay Cafiska Guud ka hor inta aan la soo saarin Xeer-nidaamiyahan, waxaa laga soo qaadayaa in loo dhammaystiray habraacyada ku qoran halkan.

Qodobka 10^{aad}
Dhaqangal iyo Habraacyo

1. Madaxweynuhu waxa uu soo saari karaa habraacyo lagu dhaqangelinayo arrimaha uu xeer-nidaamiyahani ku saabsan yahay.
2. Xeer-nidaamiyahan waxa uu dhaqangelayaa marka Golaha Wasiiradu ansixiyaan Madaxweynuhuna ku meelmariyo xeer madaxweyne waxaana lagu soo saarayaa Faafinta Rasmiga ah ee Jamhuuriyadda Federaalka Soomaaliya.